

## Dua sahabat didakwa miliki heroin

WARTAWAN SINAR HARIAN

15 Mei 2012



Dua rakan sekampung mengaku tidak bersalah memiliki heroin di Mahkamah Sesyen Kuala Terengganu, semalam.

KUALA TERENGGANU - Dua rakan sekampung di hadapkan ke Mahkamah Sesyen di sini, semalam, atas dakwaan memiliki dadah jenis heroin yang disimpan di dalam sebuah rumah tidak bernombor di Kampung Padang Tengir, Manir, di sini, 7 Mac lalu.

Bagaimanapun, kedua-dua tertuduh, Nurul Faizal Ibrahim, 31, dan Mohammad Ridhuan Razim, 21, dari Kampung Padang Tengir, Manir, di sini, mengaku tidak bersalah dan mohon dibicarakan atas dakwaan di bawah Seksyen 12 (2) Akta Dadah Berbahaya (ADB) 1952 dan boleh dihukum di bawah Seksyen 39A (2) Akta yang sama.

Berdasarkan pertuduhan, kedua-dua mereka didakwa pada 7 Mac lalu kira-kira jam 1.20 pagi di sebuah rumah tidak bernombor di Kampung Padang Tengir, Manir, di sini, telah ada niat bersama dalam kawalan dadah jenis heroin seberat 11.811 gram.

Dengan itu, mereka didakwa melakukan kesalah-an yang memperuntukkan hukuman penjara tidak kurang lima tahun atau seumur hidup dan diwajibkan dirotan tidak lebih 10 sebatan.

Pendakwa dikendalikan Timbalan Pendakwa Raya, Zulfazliah Mahmud di hadapan Hakim Wan Fadhilah Nor Wan Idris.

Sejurus pengakuan tidak bersalah kedua-dua mereka direkodkan, Wan Fadhilah Nor menetapkan 14 Jun depan sebagai tarikh untuk melantik peguam dan sebarang jaminan tidak ditawarkan kepada kedua-dua mereka.